

*W. Simms*

DISSERTATIO MEDICA

INAUGURALIS;

D E

ISCHURIA VERA.



Digitized by the Internet Archive  
in 2019 with funding from  
Wellcome Library

<https://archive.org/details/b30786058>

DISSERTATIO MEDICA  
INAUGURALIS,  
DE  
ISCHURIA VERA.

QUAM,

ANNUENTE SUMMO NUMINE,

Ex auctoritate Reverendi admodum Viri,

D. JOANNIS GOWDIE, S. T. P.

ACADEMIAE EDINBURGENAE PRAEFECTI;

NEC NON

Amplissimi SENATUS ACADEMICI consensu,

Et Nobilissimae FACULTATIS MEDICAE decreto;

PRO GRADU DOCTORATUS,

SUMMISQUE IN MEDICINA HONORIBUS ET PRIVILEGIIS

RITE AC LEGITIME CONSEQUENDIS,

ERUDITORUM EXAMINI SUBJICIT

GULIELMUS BUDD, HIBERNUS.

Ad diem 22 Augusti, hora locoque solitis.

*Et causæ quoque æstimatio sæpe morbum solvit.*

CELS. præf. sub finem.

EDINBURGI:

Apud HAMILTON, BALFOUR, et NEILL.

MDCCLX.

1875

1875

1875

1875

1875

1875

1875

1875

1875

1875

1875

1875

1875

1875

1875

1875

1875

1875

1875

1875

1875

1875

1875

# P A T R I

SUO OPTIMO, SUMMAQUE PIETATE

IN PERPETUUM COLENDO,

GULIELMUS BUDD,

S.

**P**LURA et majora quamvis tibi debeo, quam quivis fere filius patri debet, hanc tamen ob causam solam te patronum non nuncupo ; sed etiam quod nullum novi, cui hasce studiorum qualescunque primitias justius, atque tibi, dicarem. Tu enim de Medicina bene meritus es, dum sanitatis tuendae exemplum insigne in te ipso protulisti. Vino, animo fortî, sanitatem praeferens, duodecim abhinc annis, aquam solam bibere coepisti ; et quum hac methodo podagram radicitus exegeris, gaudens abstemius undis, incepto adhuc permanes. Perge, mi Pater, tibi ipsi ac podagricis, exemplo tuo, prodesse ; et si quid ego, ex studio Medicinae, ad vitam tuam, mihi carissimam, quam diutissime protrahendam, adferre possim, mei rebus in medicis coepti (utcunque cesserit) haud me poenitebit. Vale.





# DISSERTATIO MEDICA INAUGURALIS,

D E

## ISCHURIA VERA.

**I**SCHURIA, Græcè *ισχυρία*, derivari videtur ab *ισχω*, *cohibeo*, et *ουρον*, *urina*, ac suppressionem urinæ omnimodam designat; vocabulum enim *Ischuria* latiori sensu accipitur, notatque urinæ retentionem, a diversis vel renum, ureterum, vesicæ aut urethræ, vitiis dependentem.

PER Ischuriam apud autores intelligitur integra urinæ cohibitio, adeo ut ne vel gutta proveniat: verum non videmus quid obstat, quo minus Ischuria dicatur, si urinæ pauxillum subinde reddatur; siquidem in hoc casu tantum lotii retineri possit, quantum ægro brevi tempore mortem afferat. Hinc proinde sponte exsurgit Ischuriæ divisio, quæ peritæ prognosi inservit, in *totalem* et *partialem*.

INTER scriptores systematicos Ischuriæ obtinet divisio in *veram* et *notham*: illa fit vitio vesicæ vel urethræ; hæc renes vel ureteres in culpa esse ponit. In priori specie, vesica urina plena; in posteriori, vacua invenitur. De priori, seu Ischuria vesicali, vitio vesicæ vel urethræ oriente, hic paucis differendum est.

## 2 DE ISCHURIA VERA.

ISCHURIAM veram comitantur mingendi cupiditas ; tumorque in regione pubis et lumborum, qua pondus, tensio, dolor, et ardor ab ægro sentiuntur. Et hoc modo a notha dignoscitur ; quam præsentem esse dijudicamus, si adsit dolor obtusus, aliquando lancinans, et gravitatis sensus, circa renes aut lumbos ; etsi hæc signa non raro absunt\* : nullum est ægro mingendi desiderium, immissoque cathetere, nihil urinæ effluit. Ad hæc signa præterea interdum accedunt dolores Ischiadici, cardialgia, et (quod etiam frequenter contingit in calculo renum vel ureterum, sine urinæ suppressione concomitante) ipse vomitus †.

ISCHURIA vera a Dysuria eo differt, quod in illa, urina vel omnino retineatur, vel parva admodum copia, sine dolore, et plerumque præter voluntatem destillet : in hac vero, notabili cum difficultate, conatu vel dolore lotium redditur, licet sæpe quantitate, non multum naturali minori.

A STRANGURIA distinguitur, quod in hac, aliquando cum conatu, ardore, continuaque ad meiendum irritatione, guttatim prodeat urina ; majori tamen ut plurimum, quam in Dysuria, copia, ratione ad tempus habita. Urinæ incontinentiæ opponitur Ischuria.

PER Ischuriam ergo intelligimus talem urinæ excretionem impeditam, qualis in

\* Vid. Bonet. sepulchret. anat. vol. 2. p. 610.

† Juncker. conspect. med. p. 800.



maximum vitæ periculum ægrotum adducit: nec, ut Ischuria vocetur, necesse est, ut nobis apparet, urinam per plures dies (quod nonnullis clarissimis autoribus visum est\*); plane supprimi debere; quum, sive per unum, vel plures dies effluere impediatur, Ischuriæ nomen mereatur.

Et hæc Ischuriæ definitio aptior esse videtur, cum ab omnibus autoribus concessum sit, Dyfuriam et Stranguriam, etsi priorem ab Ischuria tantum gradu differre non dissimulandum est, plus molestiæ, quam discriminis secum afferre; dum Ischuriam valde periculofam, gravissimisque symptomatibus stipatam, iidem autores agnoscunt.

Cum Ischuria non confundenda est urinæ imminutio, vel suppressio per humorum copiosam in aliam partem derivationem; ut iis, sole sub ardente multum sudoris excrementibus, vel diarrhœa laborantibus quandoque accidit. De priori exemplum profert in seipso DURETUS, qui, Lutetia Lugdunum proficiscens, cum adhuc admodum juvenis esset, toto itinere vix septies octiesve urinam profudit†. De posteriori observavit DEGENERUS, urinam in dysenteria epidemica per sex, octo, decem, imo etiam quatuordecim dies retineri, ut vix guttam redderent‡. Hæc Ischuriæ species quosdam apud autores *symptomata* audit: ejus cog-

\* Ut Junkero, ibid.

† Comment. in Hollerium de morbis internis, p. 496.

‡ Teste Van Swieten comment. in aphor. vol. 2. p. 395.

nitio est expedita, quia sine dolore sese manifestat. Sed huic, ut præcipue ad Ischuriam notham pertinenti, jam plus satis immorati sumus.

HUIC malo præcipue obnoxii sunt, qui, ætate potissimum juvenili et virili gaudentes calidis spirituosiss, et diureticis abutuntur\*. Et hic non alienum est memorare, quod cel. WINTRINGHAM observaverit, in æstate anni 1723, quæ admodum fuit sicca, minus vero calida, regnantibus ventis septentrionalibus et orientalibus, multos difficultatibus urinæ torqueri†. Hæcce observatio ad aliam clar. HOFFMANNI quadrat, qui notavit, spirante borea, spasmos ac dolores vesicæ, partiumque internarum, ingravescere solere‡.

ISCHURIÆ vesicalis variæ possunt exstere causæ; quas, methodi gratiâ, nobis in *internas* et *externas* dividere visum est.

CAUSARUM internarum primariæ sunt sequentes; scil. vesicæ, ejus colli, urethræ inflammatio, spasmus; urinæ acrimonia, ac diuturna retentio; paralyss; calculus vesicæ vel urethræ; apostema; prostata tumida vel schirrofa; pituita, pus, grumus, caruncula; hernia cystica, aut alia; tumor cujuscunque generis harum partium; meatus urinarii coarctatus: vitia partium vicinarum; scil. tumor quicunque; fæx dura; flatus; hæmorrhoides

\* Junckeri conspect. med. p. 800.

† Comment. Nosolog. p. 66.

‡ Med. rat. syst. pars secunda tomi quarti, p. 423.



internae; inflammatio; uterus a foetu aut alia quapiam materia distentus; gonorrhœa; materies febrilis, podagrica, scorbutica, erysipelatosa, rheumatica retropulsa; menstrua et hæmorrhoides suppressa: quibus adhuc plura facile addi possent.

CAUSÆ externæ etiam sunt multifariæ; quarum præcipuæ sunt vulnus; contusio circa pudenda, os pubis vel regionem vesicæ; vertebrarum luxatio; frigus.

CUM non ignari simus, nullam perfectam morbi curationem fieri, si causa nos lateat; ad causarum jam memoratarum explicationem nunc nosmet convertamus.

*Vesicæ &c. inflammatio.*] Hæ partes, non secus ac aliæ, inflammationi sunt obnoxia; verum inflammationi occasionem sæpius præbent calculi, materiave quæpiam aliena in vesica contenta, quam spissus et phlogisticus sanguis. Cum vesica inflammatione tentatur, etiamsi in ipsa cervice sedem suam non habeat, sphincterem tamen adeo spasmodice constringi, et per consensum affici posse, ut ne vel guttula urinæ deponatur, hodie nemo non fatetur. Cum vero vesicae collum vel urethra inflammatur, facile concipere possumus, quomodo a tumore, qui plus minus omnes fere inflammationes comitari solet, urinae intercludatur via. Ischuria ab hac causa orta, infrequens est; sed quando contingit, saevior plerumque evadit, propter urinam acrem, partem inflammata perpetim alluentem: cognoscitur

tur ex concomitantibus ardore, tumore, ac dolore, in regione pubis ; frequenti desiderio stimulo ; et febre, plusve minusve acuta. Si solum vesicae collum inflammatione vexetur, quod frequentius evenit, tumor ac calor digito, in anum immisso, saepe percipi possunt (digitum oleo prius immergere convenit) : quinetiam tenesmus huic malo non raro sese adjungit ; nec non ani \* constrictio ; alvi siccitas ; anxietas ; frigus extremorum ; et vomitus. Observavit magnus BOERHAAVIUS, urethram post gonorrhoeam, inflammationibus obnoxiam relinqui ; additque, hoc mali genus non infrequens esse †.

*Spasmus.*] Quando a spasmo Ischuria vesicalis originem suam trahit, sphincterem, ut videtur, ut plurimum occupat ; si enim vesicae corpus spasmo laboraret, ejus effectus esset urinam copiosius exprimere. In omni Ischuria vesicali, quae causam suam habet supra urethram positam (ea forte a tumoribus, collum vesicae obturantibus, vel comprimantibus, paucisque aliis quibusdam exceptis), sphincter spasmo, seu quadam constrictione affligitur : sive hic spasmus a quadam physica causa, v. g. calculo vesicam irritante, dependeat ; sive a mutatione aliqua, nervis sphincteris inducta. Spasmus igitur cervicis vesicae videtur esse causa proxi-

\* Heister compend. med. p. 252.

† Comment. in Instit. § 821.



ma cujusque fere Ischuriae verae. Urinae ab hac causa ortam suppressionem, hypochondriaci, hysterici, maniaci, melancholici, iique qui mobili systemate nervoso praediti sunt, prae caeteris, patiuntur. Sic ex sola constrictione hysterica clar. HALLERUS vidit Ischuriam undecim dierum \*; et cl. RUTHERFOORD, in hac academia medicinae professor, in praelectionibus suis tradit, se vidisse in maniatis urinae retentionem, cum alvi suppressione conjunctam, quae duas tresve septimanas duraverat. Cum spasmus adest, aegri strictionem † quandam circa collum vesicae percipiunt, et catheteris immissio ad cervicem usque facilis est, sed aliquando non ulterius. Alvi adstrictionem, vel prodromum, vel comitem pene semper habet Ischuria.

Hoc spasmo, et ejus consecutione, Ischuria vera scil. infantes laborare videntur ex vitio lactis nutritici; aut ab errore in diaeta, si ablectentur; cum vel ‡ nihil urinae reddunt, vel guttatim et cum gemitu. Dum hoc malo excruciantur, lac ex mamma copiose exsugunt, neque tamen urinam reddere possunt ||. Acidum frequenter in causa est.

*Urinae acrimonia ac diuturna retentio.*] Vesica, a nimia urinae copia diutius cohibita, admodum distenta, omnem vim se contra-

\* Comment. in Instit. § 366.

† Heisteri compend. med. p. 253.

‡ Hoffman. med. rat. vol. 3. p. 493.

|| Ibid.

## 8 DE ISCHURIA VERA.

hendi brevi amittit; dum sphincter spasmocorripitur, et, pro ratione distentionis, semper constringitur. Urina adhuc ex ureteribus in vesicam destillare pergit, donec, ex magna distractione, illae vesicae fibrae musculares, quarum ope urina expellitur, paralyticae evadant: imo ob urinam diu retentam, non desunt ruptae vesicae exempla\*. Licet autem hunc finem Ischuria perraro habeat, saepissime tamen inflammatio, et sphacelus, urina augesciente, moraque et calore loci † acriori reddita, presso pede sequuntur. Haec sunt longe frequentissimae Ischuriae vesicalis causae; et ex aegri relatu novimus, an, propter modestiam, vel urgens aliquod negotium, urinam deponere nimis diu distulerat. Rarum modestiae in cane exemplum refert BOERHAAVIUS ‡, qui, verecundum animal, quod, ad anatomen destinatum, incluserat, perfecta, ob urinam diu suppressam, Ischuria detentum invenit. Cel. astronomus

\* Apud Peyer. Pocon. Pyth. exerc. p. 60. Wendland Phil. Transf. n. 99. et in bove vidit Ledelius, teste Hallero, comment in instit. § 384.

† Quam acris urina, in vesica diu retenta, fieri possit, ex historia, ab illustri Van Swieten relata, patet, qui hisce verbis utitur. "Senex, in hac urbe rei frumentariae mercator, Ischuria laborabat: chirurgus, in simili casu huic aegro levamen per catheterem immissum afferre solitus, aberat: noluit alteri curam committere aeger; sic mansit usque in diem sequentem, donec in urbem rediret chirurgus, qui, cathetere immisso, eduxit urinam, tam putridam, ut argenteum catheterem iridis coloribus tingeret, et chirurgum ipsum, qui incautius hauserat putridissimae urinae halitum, levi peripneumonia afficeret per aliquot dies." Comment. in aphor. vol. I. p. 131.

‡ Comment. in instit. § 821.



## DE ISCHURIA VERA 9

TYCHO DE BRAHE hoc morbo extinctus est \*.

URINAE acrimoniae raro debetur Ischuria; etsi aliquando, in febribus quibusdam, tam acris et vere alcalina evadat, ut cum spiritu nitri mista, quam maxima sequatur effervescencia †. Attamen, dysuriae potius, quam Ischuriae favere observatur. Urinam hujus generis in culpa esse cognoscimus, si aeger, praesertim senex, lotium foetidum antea reddiderit.

*Paralysis.*] Resolutio ipsius corporis vesicae non raro in senibus occurrit †; et, si sphincter paralyti libera manet, illa causa Ischuriae evadit, quae toties ejusdem effectus est. Casum refert Ischuriae quatuor, vel quinque dierum DOCTOR MURDUCK, in quo aeger catheterem pertinaciter respuit ‡; ille vero, quinto die, relaxationem *extrusorum* urinae suspectam habens, aegro corticem Peruvianam dedit, et morbum sanavit. Sed quid, quaeso, per extrusores urinae intelligitur? Nihil, ut opinor, praeter musculosam vesicae tunicam; et hanc pene resolutam esse debere, per Ischuriam vesicalem quinque dierum, omnes agnoscent. Utcunque vero res se habet, non inutile est scire, Ischuriam hancce per Corticem sanatam fuisse.

HUIUS quoque causae refertur urinae suppressio, quae in deliriis et soporosis affectibus aliquando contingit ||; nec non ejus

\* Ibid.

† Heister, *ibid.* p. 257.

‡ Lond. med. obs. et inquir. vol. I. p. 81,

|| Riverii opera, p. 363.

retentio ex abusu narcoticorum, sed praecipue, opii, de qua JACCHINUS\*. Nulli†, vel leviores hanc speciem dolores comitantur.

*Calculus*] Ischuriae ansam dare potest duobus modis; scil. vel ob calculum, vesicae ostio objectum‡, vel ob irritationem corporis vesicae, exquisito sensu praeditae: prior causa longe frequentior est posteriori, quae, quando contingit, sphincterem semper in consensum raptum, et spasmo affectum, denotat. A calculis, in vesica hospitantibus, non solum tunica interna stimulatur, verum etiam nonnunquam tota vesicae substantia exeditur, et urina per abdomen effunditur; cujus exemplum videre licet apud BONETUM||. Calculus in causa esse noscitur ex signis praegressis, scil. sensu gravitatis in vesica; pruritu quodam circa pubem et perinaeum; frequenti ad meiendum irritatione; urina guttatim prodeunte, et maximo cum cruciatu; dolore in glande penis post mictionem; calculi volutione; mictu in quadam corporis positione tantum facili; et urinae pleno rivo prodeunti subito impedimento; quibus, in infantibus, accedit quaedam titillatio, ut genitalia perpetuo scabant. Haec autem saepe fallunt; dum perceptio calculi per catheterem, digitumve in anum immisum, unicum est signum pathognomicum.

\* Teste Sennerto. tom. 1. p. 405.

† Heister ibid.

‡ Boerhaavius possidebat calculos piriformes, qui ostium urethrae perfecte obturaverant.

|| Sepulchret. anat. tom. 2. de Ischuria.



UT calculus vesicae non infrequenter fit Ischuriae causa, ita in urethra exitum urinae intercludere potest. Urethrae inhaerere novimus per tactum, vel catheterem. Arenam egressum urinae prohibere detegimus, a materie arenosa, prius cum urina emissa; quam raro obstruat, nisi lentus humor vel pituita adsit.

*Apostema.*] Abscessus, perinde atque inflammatio, Ischuriae causa fieri potest, sed solummodo ob ejus molem: et BENEVO-  
LUS toties abscessum in glandula prostatica esse Ischuriae causam invenit, ut crederet, mala, quae alii autores carunculis adscripserunt, ex hoc fonte solo emanare \*. Quod haec causa praesens sit, sensus gravitatis in hac parte, horripilationes vagae, et quod multo maximum est, signa inflammationis antegressae indicant.

*Tumida vel schir. prostatica.*] Ab hac prostatica aequo majore, atque indurata, lethalem urinae suppressionem vidit cel. MORGAGNUS †; et cel. HEISTERUS aliquoties Ischuriam, ab hac causa ortam, observavit ‡. Si ejusdem glandulae schirrus viam urinae denegat, tumor durus, indolens, vel leviter tantum dolens, in perinaeo per tactum vel catheterem percipitur.

\* In libello de carunculo urethrae; teste Heistero, ibid. p. 253. et chirurg. p. II. 138.

† Advers. anat. III. p. 83.

‡ Ibid. p. 251.

*Pituita.*] Ope mucī vesica mollis, laxa ac lubrica servatur; et contra urinae stagnantis acrimoniam defenditur: Si hujus mucī secretio, ab attritione et irritatione calculi, vel cujuscūque aliae materiae, in vesica contentae, aut ab aliis corporis partibus huc delatae, multum augeatur; lentior redditus, imo quandoque solidescens, obstruendo collo vesicae, vel urethrae aptus fit. Ab hac causa iter urinae raro occluditur; verum praesentem esse dijudicamus, si mucī magna copia per mictum ante excerni consuevit.

Pūs, e renibus in vesicam descendens, vel ex vesicae ulcere natus \*, aliquando Ischuriae viam sternit. In hoc casu vesica vehementissimum dolorem patitur, ac ab eo, qui calculum comitatur, non differentem †: stomachum etiam saepe per consensum affici, his verbis testatur CELSUS, “ non ignoramus, orto vesicae ulcere, saepe stomachum affici, cui cum vesica quoddam confortium est, exque eo fit, ut neque retineatur cibus, neque si quis contentus est, concoquatur, neque corpus alatur ‡.” Si pūs a renibus antea destillavit coctum et minime foetidum, renēs accusantur; sin uri-

\* Cel. Sharp exulcerationem vesicae esse morbum admodum rarum affirmat, et mucum esse, qui puris speciem adsumit †: verum certior factus sum ab illustri medico, in hac urbe, luculenta in praxi versato, hoc malum non modo non rarum esse, sed etiam satis frequenter occurrere.

† Heister. *ibid.* p. 258.

‡ Libr. 7. cap. 27. p. 486.

† *Treatise of surgery*, p. 81.



na, prius deposita, purulenta, foetida et nonnunquam sanguinea esset, pus ex ulcere vesicae provenire cognoscimus. Quando collum vesicae ulcere vexatur, vel urethra sincerum pus, absque urina, excernitur \*. Cum insuper corpus vesicae, aut illius cervix ulcere affligitur, dysuria perpetua adest, cum continuo dolore, in parte affecta conjuncta †; quae ab ulcere renum procul absunt.

SANGUIS etiam, sive a renum, ureterum, vel e vesicae ipsius vasis procedat, interdum adeo concrescit ‡, ut orificium vesicae aut urethram obstruat; vel fibras vesicae sensiles stimulando, sphincterem spasmō corripiat. Hanc causam mictio cruenta praecedere solet; et dignoscimus ex vesicae vasis prorupisse, a difficultate mingendi ||; ardore circa anum cum tenesmo; et dolore pungenti, a glande ad perinaeum affligente, rigidaque penis tensione stipato.

*Caruncula.*] Cum urinae impedimento est caruncula (sive, ut cum BRUNERO loquar, cicatrix tantum, vel, cum aliis, urethrae stricture) gonorrhoeae ut plurimum originem suam debens, Ischuria sensim obrepit, et urina parvo et subtili rivo effluit, qui paulatim minuitur, et demum integre supprimitur.

\* River. opera. p. 359.

† Ibid.

‡ Boerhaavius vidit sanguinem, hic concretum, vermium speciem prae se ferre; et idem observavit de pituita. Comment. in Instit. § 821.

|| Hoffman. med. rat. p. 11. tom. 4. sect. 11. cap. vi.

Praeterea, carunculam urinae transitum impedire cognoscimus, per catheterem aut specillum plumbeum : aeger quoque mingendi cupiditate laborat, ab irritatione materiae alienae, urethrae inhaerentis.

*Hernia cystica aut alia.*] Non desunt exempla vesicae, in scrotum, per foramen musculi obliqui externi, vel sub ligamento POUPARTII, sic delapsae, ut inde hernia inguinalis, scrotalis, vel femoralis fiat \*. Hæc si in molem magnam increverit, urinae retentionem sequi posse observationes docent †. Narrat BOERHAAVIUS ‡ hujus mali historiam in Judaeo, qui, dum nuptias suas celebraret, vesicam plenissimam exonerare distulerat. Miser hicce semel intra viginti quatuor horas lotium reddebat ; tribusque antea quatuorve horis talibus doloribus afficiebatur, qualibus mulier parturiens. A mesenterio ac tenuibus omnibus intestinis, in scrotum protrusis, et collum vesicae comprimantibus, Ischuriam vidit SALA \*\*.

*Tumor harum partium.*] Hujusmodi exempla apud BONETUM, SCHENKIUM, aliosque passim occurrunt ††. Horum prior miram satis Ischuriae causam refert, scil. carnem

\* J. Dom. Sala, Platerus Bonetus, Ruysch, Petit, Mery, et M. Verdier, (testante cel. Pot, Treatise on ruptures, p. 226.) tales casus memorant.

† Horum jam memoratorum clar. virorum.

‡ Com. in institut. § 712.

\*\* Bonet. sepul. anat. tom. 2. obs. 18. de Ischuria.

†† Ibid. obs. 10.



fungosam, ex vesicae fundo per ipsam urethram excrescentem, ipsamque obturantem. Rarum quoque Ischuriae casum, a cl. WHYTT, in hac academïae medicinae professore, mecum nuper communicatum, jam enarrabo.

VIR generosus, quinquagenario major, qui complures ante annos, frequentius solito mingere coactus fuerat, et de nescio qua congestione circa vesicam per aliquod tempus fuerat conquestus; post plenum cibum, primo, dolore circa os pubis, dein totali urinae suppressione, corripiebatur. Viginti quatuor horis elapsis, intromissus est catheter; at parum tantum urinae effluxit. Medicus cel. tunc largam satis laudani liquidi dosin aegro propinavit, hoc cum emolumento, ut die sequente, magna lotii quantitas praeter voluntatem profluxerit. Tumor tamen et tensio supra os pubis manebant; nec urina exivit, nisi parva copia, eaque emissa, aequae dum aegrotus in somno, vigiliave versaretur. Catheteris introductio iterum atque iterum tentabatur, sine ullo alio effectu, atque urinae cochlearis unius, alteriusve effluxu. Tandem die morbi xvii. urinam copiose reddidit; hoc vero non obstante, die xix, vitam, sed non antequam leucophlegmaticus evasisset, cum morte commutavit. Aperto cadavere, phaenomena, quae sequuntur, oculis sese obtulerunt.

VESICAM inter et intestinum rectum inventus est tumor, posteriorem partem et latera vesicae

vesicae occupans, praecipue autem, secundum latus dextrum, quod valde crassum erat, sese extendens. Vesicae tunica interna insigniter flaccida erat, et, perinde quasi ab aliis tunicis sejuncta, valvae non absimilis, supra vesicae collum pendebat; etsi eadem haec tunica interna, a vesicae collo sursum ad initium hujusce plicaturae, tensa admodum ac dura erat. Vesicae partes induratae ureteres amplectebantur; horumque dexter maxime distentus erat, ejusque orificium adeo angustum, si non omnino occlusum, ut urinae destillatio in vesicam, si ulla fuerit, renis ejusdem lateris secretioni nullo modo responderit. Vesica urina dulci et inodora reperta est plena; et nihil erat quod censeremus, urinam diu in vesica remansisse: duobus enim ante mortem diebus, ut supra diximus, magnam urinae copiam reddebat aeger; et postea urinae stillicidio ad vitae finem usque laborabat.

Ex his perpensis verisimile videtur (cel. inspector cadaveris observare pergit) urinam nullum e vesica exitum invenire posse, donec adeo distenta esset, ut istam plicaturam parum ecedere faceret; et, simul ac iste gradus distentionis minueretur, eandem plicaturam vesicae orificium statim occlusisse. Hac ratione, vesica semper urina referta erat, eo quod nulla major urinae copia per catheterem educi poterat, quam ea, quae infra plicaturam erat; et quae, ultima evacuatione excepta, cochlearia duo vel tria quantitate



titate non superabat. JOHANNES MACGILL, chirurgus nuper Edinensis, refert Ischuriae casum, huic aliquatenus similem\*.

*Meatus urinarii coalitus.*] Sic BOERHAAVIUS Ischuriam vidit a parte urethrae exulcerata, intra octo vel decem somni horas, quibus aeger potu non usus est, perfecte concreta; haud aliter quam palpebrarum, limbi aut oris labia, aut exulcerati digiti aliquando concreescere solent; additque, hoc malignus aegre curari. Alio in loco haec verba habet idem auctor. “Ischuria † visa est, in qua nulla urina efflueret, et catheter ex vesica excluderetur: extincto homine, in cadavere reperiiebatur tumor, collum vesicae obsidens, non in cavitate ipsa, sed ad latus, ut via penitus connata, urinam omnem retinuerit ‡.”

IPSE puerum vidi, cujus peni alter ludibundus puer filum arte injecit; hoc cum effectu, ut, partibus supra et infra ligaturam tumentibus, filum brevi evanesceret; dum latera urethrae adeo stricte comprimebantur, ut non posset non impediri mictio. Iracundiam parentum reformidans misellus, dolorem a ligatura, ac urina urgenti ad sequentem diem usque celabat; quo tempore filum viam sibi in urethram fecaverat, per quam lotii magna copia exivit. Urina per

\* Med. Essays & obs. vol. 6. p. 287.

† Com. in Instit. § 821.

‡ Ibid. § 709.

aliquot dies ex hoc orificio excerni pergebat, antequam aegri parentes a chirurgo consilium peterent ; qui tandem accitus, et urethrae latera infra ligaturam, ex contactu perdurante, concreta inveniens, transitum urinae naturalem reddidit instrumento, *celato Trocar* dicto ; aptaque encheiresi chirurgica puerum sanavit. Dolor, quem hicce puer toleravit haud absimilis erat illi, quem saevissimus, inhumanissimusque tyrannus, TIBERIUS, ad inimicos, et quos odio habebat, excrucianos, excogitavit\*.

*Tumor quicumque vicinarum partium.*] Inter numerosas, easque satis miras, plurimos apud auctores inveniendas Ischurias, ab hac causa natas ; hanc occasionem amplector narrandi Ischuriae casum, a cl. MUNRO juniori, in hac academia medicinae professore, haud pridem mihi impertitum ; tamque insolitum, ut nullus auctor, quantum novi, talem vulgaverit.

VIR, annos triginta et quinque agens ; habitu gracili praeditus ; haemorrhoidibus obnoxius, et vitae sedentariae adsuetus, in frequentem, at non dolentem, mictionem incidit. Femora ejus et crura dolore vexabantur ; nec non ossis ilii pars interna, ut non facile sedere posset, nisi cum corpus ad latus sinistrum inclinaret. Varia medicamenta expertus est, sine fructu ; donec tandem, elapso jam a prima invasione anno,

\* Ibid. § 366; teste Boerhaavio.



urina tantum guttatim proruperit, et, post tres menses, in suppressionem urinae dilapsus est miser. Renixus tam fortis circa collum vesicae catheteri obvenit, ut ejus immissio omnino erat impossibilis; et digito in anum introducto, magnus tumor intestinum rectum inter ac vesicam percipiebatur. Dolor, tumor et tensio circa pubem ingravescabant ad mortem usque, quae post mensem sequebatur. Æger, per totum hoc tempus parvam urinae copiam de die reddebat, illamque magno cum dolore, et difficultate, genibus innixus, inclinato simul antrosum corpore, et abdomine manibus suis compresso. Alvus admodum stricta erat. Ante mortem ejus crura, pedesque oedematosi facti sunt. Cadavere, die sequente, aperto, aquae librae duae in abdomine inventae erant, et colon faecibus refertum. Vesica (quae ipsa erat subrubri coloris, supraque umbilicum extendebatur, et cujus aliqua pars, recto vicina, sphacelo afficiebatur) tunicis suis crassior justo apparebat, spissamque ac turbidam, urinam, *Coffee* dicto haud absimilem, ad libras octo capiebat. Vesica depleta, in conspectum venit tumor, intra os ilium sinistrum situs, qui vesicam ex pelvi prorsus extruserat, et ejus collum contra os pubis adeo fortiter compresserat, ut catheter immitti non posset. Ren sinister major consuetudo erat, ac mollior; et ejusdem ureter, qui supra tumorem pertransivit, digitum ca-

pere poterat. Tumor hicce, duos mole pugnoscens, tunica forti et tenaci gaudebat, quae materiam, parti cinericiæ cerebri, jam putrescenti, similem continebat. E latere pelvis dextro alius aderat tumor, altero plus dimidia parte minor, in quo erat contenta materia, a semine bene concocto haud diversa, at spissior. Ambobus erat figura, irregulariter rotunda; et ambo, una cum intestino recto, totam pelvis cavitatem occupavere, et vesicae rectoque adeo valide adhaeserunt, ut non nisi cum difficultate ab iis separari possent. Unus ex mortui amicis dixit, aegrum saepe conquestum fuisse de dolore testium; verum aegrotus, ut homo erat modestiae non vulgaris, hoc omnes alios celabat: amicus idem etiam narrabat, se credere, illum nunquam cum femina rem habuisse\*.

*Faeces durae.*] Apud BONETUM prostat Ischuriae casus a solis scybalis, intestinum rectum implentibus, ac collum vesicae prementibus †. Apud eundem auctorem extat exemplum urinae retentae, a flatu, in intestino recto collecto, multis cum liquidis excrementis ‡.

HÆMORRHOIDES internae dupliciter Ischuriam efficere possunt, scil. vel ob earum molem, collum vesicae prementem; vel ob inflammationem, acutissimum dolorem, et

\*. Hosce tumores non alios fuisse quam induratas, ac admodum distentas vesiculas seminales, unicuique hunc casum sedulo perpendenti, ni fallor, apparebit.

† Ibid.

‡ Ibid.



tenesmum, quae saepe pariunt, sphincterem vesicae per consensum afficiundo.

Apud HOFFMANNUM habetur historia Ischuriae fatalis, a coagulato sanguine, qui ex vulnere omenti in ipsam pelvim stillaverat, et valde comprimendo vesicae collum, faevissimos dolores, et Ischuriam fecit, quae brevi aegrum de medio sustulit \*.

Cel. AMYAND casum narrat feminae, quae Ischuria laborabat, propter sanguinem menstruum a carunculis myrtiformibus, post partum concretis, inclusum, urethramque prementem. Apertura transversa facta, sanguinis libris sex exitum dedit; et urina exinde sine impedimento profluxit †.

INFLAMMATIONI recti aliquando debetur urinae suppressio; nam vesicae sphincterem inter et rectum, non solum a fibrarum connexionem, sed etiam a nervis, ab eodem plexu hypogastrico provenientes, mutuus quidam consensus locum habere videtur; adeo ut, hoc inflammato, ille in mali consortium trahatur.

*Foetu.*] Gestationis tempore, mense vero potissimum quarto, aut quinto incipiente, vesicae collum ab utero gravido ita comprimitur, ut fluxus urinae aliquando, etsi raro, intercipiatur. Hoc malum quoque ex utero paulo inferius in vaginam descendente contingit ‡; nec non, si ovum non fundo,

\* Med. rat. pars II. tom. 4. p. 426.

† Phil. trans. abridged, No. 422.

‡ Smellie's midwif. vol. 2. p. 123.



sed uteri collo adhaerescat, quod ideo primo dilatationem patitur, omniaque in pelvi contenta necessario premit: hinc urinae retentioni ab hac causa ortae, nonnunquam accedit difficultas alvum deponendi. Hicce morbus autem frequentius fit in partu difficili ac protractiori, a foetus capite, pelvi inhærente, et vesicae cervicem, urethramque comprimente \*; dum corpus vesicae, pressu uteri, liquore amnii expulso, nunc mole diminuti, levatum, a copia urinae influente facilius sese distendi patitur. Et post partum, quando compressio tollitur, non raro evenit, quod fibrae, ultra modum prius extensae, urinam expellere nequeant, praesertim si vesicae cervix, vel urethra tumore aut inflammatione vexetur; in quo casu aegra vehementibus doloribus lumborum, dorsi, inguinum, at maxime partium, supra os pubis positarum, plerumque excrucietur †.

EODEM modo, mala ex schirroso, calloso utero, fero aut aëre repleto, tumoribusve partium vicinarum quibuscunque, facile cum vesica communicari possunt; quorum similia plurima vitia apud SCHENKIIUM, BONETUM, aliosque observatores inveniuntur.

*Gonorrhoea.*] Sic HOFFMANNUS, a gonorrhoea venerea, perperam et nimis cito

\* Smellie's midwif. vol. I. p. 162.

† Ibid.

curata, morbos vesicae, urinaeque retentionem induci, saepius observavit \*.

*Materies podagrica, &c. &c.*] Idem HOFFMANNUS generosi cujusdam casum narrat, qui podagricus, imo pedibus jam dolentibus, iter milliarium aliquot fecit, sub aëre valde humido et frigido: dolores quidem abibant, sed postea urinae partiali retentione corripiebatur †.

TOTIES jam memoratus auctor alium Ischuriae partialis casum memorat, a materia scorbutica purpuracea retroeunte, ob frigus admissum, crebriusque celebratam venae-sectionem ‡.

AD hunc modum Ischuria, suppresso haemorrhoidum aut mensium fluxu saepe oritur, praesertim in plethoricis, et feminis post quinquagesimum annum; hinc quoque inflammationes ac sphaceli vesicae, et intestini recti aliquando sequuntur.

Dum haec scribo, in Nosocomio Edinburgensi manet aegra, quae Ischuriam duorum dierum, nec non alvi pertinacissimam adstrictionem duarum septimanarum, jam multoties experta est. Haecce misera tandem in Ischuriam totalem incidit, quae sex integros dies durabat, propterea quod catheterem obstinate respuebat. In toto morbi cursu nihil novi occurrebat, nisi quod, tertio die, ae-

\* Med. rat. ibid. p. 414.

† Ibid. p. 419.

‡ Ibid. p. 415.



grota, de dolore pungente oculorum, non secus ac si (ut ejus verbis utar) vitrum contusum in illos immitteretur; et de sapore urinoso, qui, quarto die exortus est, multum conquereretur. Dolor oculorum, post Ischuriam ab enemate terebinthinato solutam, dies adhuc aliquot perstitit; sapor vero urinosus simul cum Ischuria evanuit. Oculos in hoc morbo aliquando pati, ex sequenti quoque observatione, a cl. CULLEN, in hac academia medicinae professore, in praelectionibus suis tradita, constat. “In Ischuria notha, cum jam per septem dies substiterat urina; in sinistri oculi tunica adnata apparebat rubedo, quae in horas invalescens, palpebras etiam, et partes vicinas occupabat; quae tandem omnes, sanguine effuso, liventes et tumidae, ut in sugillatione, conspiciebantur.”

Ad casum, magis insolitum, nunc pervenimus.

DIU valetudinaria, delicata, et valde mobili systemate nervoso praedita virgo, circiter annos nata unum et viginti, cui menstrua nunquam secundum periodos regulares effluerant, aliquando per menses prorsus retenta; postquam fluxus iste salutaris duabus horis duravisset, at tunc subito fuisset suppressus, in totalem Ischuriam dilapsa est. Summus sequebatur dolor in regione vesicae, maximusque urinam deponendi tenesmus; justo vero

vero verecundior misera, causam hujus cruciatus pertinaciter reticebat. Bidui vel tridui aderat alvi adstrictio. Die ab urinae suppressione secundo, nausea, et paulo post frequentiori aquae, saporis urinosi, exercebatur vomitu, qui tantum una cum Ischuria cessavit. Per id tempus, sudor ex toto corpore dimanavit, sed circa sternum praecipue, qua (ut una cum illa loquar) *cochleatim* facile colligi posset. Dolore capitis acerrimo torquebatur, et oculi ejus eundem dolorem pungentem, supra memoratum, patiebantur. Conaminibus illis naturae, scil. vomitu urinoso, ac perpetuo sudore, non obstantibus, vesica lotio distendi pergebat, intolerabili cum cruciamento, ad diei usque, ab invasione, sexti finem; quo tempore, urinae unciae plus minus octo, intra horae dimidium, cum levamine per umbilicum destillabant: et mihi dubium non restat, quin multo major copia per hanc viam dimitteretur, ni urinae circiter libris sex liberum transitum conciliavisset, et Ischuriae, et alvo strictae finem imposuisset, enema terebinthinatum. Eam invisebam paulo ante urinae per umbilicum eruptionem, aequae ac per totum morbi cursum, etiamsi morbum, quo laborabat, ego, pariter cum omnibus aliis, ignorabam; et maxime cruciatam inveni: pulsus erat tunc velox, sed non debilis; fitis adfuit ingens, summaque anxietas.

IN hoc casu, jamjam relato, urinae vo-  
D mitus



mitus, et per umbilicum exitus notatu digna sunt, at exitus praecipue ; nullus enim auctor, quatenus mihi notum est, Ischuriae solutionem per umbilicum enarrat, praeter ANDREAM LAURENTIUM, qui sic loquitur. “ Puella quaedam, cum suppressa per multos dies fuisset urina, tandem per umbilicum urinam profudit. Narravit id saepius in scholis nostris BARTHOLOMAEUS CABROLIUS, chirurgus expertissimus, mihi amicissimus, et academiae nostrae dissector ordinarius. \*”

URINAM, in duobus hisce historiis, per urachum penetrasse, prorsus indubium videtur, cum in utraque illarum, nulla hydroptica symptomata se manifestabant. Vomitus urinosi pauca habemus exempla, quae apud auctores infra citatos videri queant †. Missis jam causis internis, pauca de externis dicenda supersunt.

*Vertebrarum luxatio.*] Causa quidem Ischuriae possibilis, sed rara. Immortalis HIPPOCRATES dicit, “ Medulla spinæ si aegrotaverit, five ex lapsu, five ex alia aliqua causa, five sponte ; homo et cruribus impotens fit, ut neque, si tangatur, percipiat, neque ventre aut vesica circa prima

\* Schenk. obs. med. p. 489. vel Andr. Laurent. lib. 2. quæst. 28. anatom.

† Bonet. sepul. anat. vol. II. p. 622. Hildan. p. 344. Salmuth. cent. 2. obs. 2. Marragoni hist. de l'acad. des Scienc. 1715. obs. 3. Stalpart. obs. 51. cent. 1. Helvet. in cane, cui arteriae emulgentes ligatae sunt. Hist. de l'acad. des Scienc. a. 1722. p. 32. fidem faciente Hallero, Comment. in Infit. §. 375.

tempora stercus vel urinam egerat, nisi co-  
actus. Quum autem vetustior factus fuerit  
morbus, non urgente homine, et stercus  
prodit et urina. Moritur autem post haec,  
non multo tempore interposito\*.” Ex  
hac observatione colligere est, a compre-  
sis nervis, non semper sequi urinae inconti-  
nentiam, sed aliquando suppressionem. Cum  
medulla spinalis injuriam patitur, ita ut Is-  
churiam faciat, nervi, qui deferuntur ad  
vesicae corpus, resolvi videntur, dum ii,  
qui sphincteri prospiciunt, illaesi manent;  
his enim pariter laesis, urinae incontinentia  
potius, quam Ischuria, expectanda foret;  
vel urina clam dilaberetur.

*Frigus.*] Cum huic causae originem suam  
debet Ischuria, frigus, ut videtur, intensum  
esse oportet †; frigus enim moderatum non  
modo non urinam suppressit, sed etiam mo-  
vet, ac auget. Si frigus itaque in culpa sit,  
vel sensum vesicae hebetari, ut nobis appa-  
ret, supponit, vel sphincterem, ad quem  
formandum omnes fere vesicae fibrae mus-  
culosae colliguntur, fortius contrahi, aut  
spasmo affici, vel utrumque simul locum  
habere. Et eodem modo explanari potest,  
quomodo contrarii affectus ab eadem causa  
producantur, scil. Ischuria, et urinae incon-

\* Prorrhēt, lib. 2.

† Ut Amat. Lusitanus in cent. iv. curat. 10. Forestus, lib.  
25. obs. 18. et Pechlinus, lib. 1. obs. 10. observant; teste  
Heistero in chirurg. part. 2. cap. 137.



tinentia, ut RIVERIUS observat, qui sic loquitur. “ Dicendum est, quando frigida  
 “ intemperies solum vesicae sensum immi-  
 “ nuit, vel abolet ; fieri suppressionem uri-  
 “ nae, quia vesica non irritatur ad expellen-  
 “ dum : si vero facultas motiva laedatur,  
 “ quae est in musculo sphinctere, ab eadem  
 “ intemperie fieri incontinentiam, eo muscu-  
 “ lo relaxato” \*. HIPPOCRATES inquit,  
 “ Ex refrigeratione interceptio urinae, pes-  
 “ sima †.”

QUONIAM Ischuria gravissimis symptoma-  
 tibus stipatur, quaedam eorum enarrare hic  
 non absolum videtur. Primo occurrit an-  
 xietas ; dolor capitis ; inquietudines per-  
 petuae ; dein, circa diem sextum, vel prius,  
 hebetatio ; dormitatio ; inundationes per  
 infomnia ‡ ; sudoris ac animae foetor ; imo  
 nonnunquam ipse sanguis, ex brachio missus,  
 urinam olet ; vomitus ; saliva urinosa ; pul-  
 sus velox ; sitis ; delirium ; respiratio rara || ;  
 convulsio ; lethargus, et ipsa denique mors.  
 Quibus adhuc addere possum perceptionem  
 quandam in oculis, quasi vitro contuso pun-  
 gerentur.

\* Oper. med. p. 362.

† In Coacis praenotionibus.

‡ Boerhaav. comment. in instit. § 384.

|| Cl. Whytt inquit. “ In aegro, cujus cerebrum propter  
 “ Ischuriam afficiebatur, intervallum, unius expirationis finem  
 “ inter et initium inspirationis subsequens, minutorum se-  
 “ cundorum, a septem ad decem, multoties observavi.” Vi-  
 tal and involuntary motions, p. 192. Haecce Ischuria le-  
 thalis evasit.

ORDO quidem nunc exigit, ut symptomatum, hunc affectum concomitantium, rationem dedissemus : verum, cum vel ex urinae absorptione, vel ex impedita lotii secretionem, feri urinofi est in sanguine retentio, ejusque putrefactio, lymphaeque, et, qui ex hac fecernuntur, liquorum corruptio similis \* ; haec symptomata ex notis urinae qualitatibus facile deducuntur ; praecipue quando, in cerebri ventriculis, urinam ut plurimum reperiri, docuerit corporum, hoc morbo extinctorum, dissectio †.

BONUM vel malum est PRÆSAGIUM, procausarum et symptomatum varietate. BOERHAAVIUS ex multis observationibus statuit, Ischuriam perfectam, lethalem plerumque evadere, intra dies quindecim ‡. Apud observationum scriptores longioris Ischuriae exempla sunt. Partiali urinae suppressione laborans aeger, diutius inter vivos numerari possit. Melius tolerant Ischuriam, quibus ferofae diarrhoeae superveniunt ||. Prognosis est generalis, quod, ni cito removeatur, teterrima symptomata, ipsamque mortem sibi adsciscat. Ischuria a vertebrarum luxatione, nervorum paralyfi, aut injuriis externis circa os sacrum, vel perinaeum, plerumque est funesta : itidem, si morbis acutis supervenit ;

\* Gaub. instit. Patholog. p. 287.

† Boerhaav. ibid.

‡ Ibid.

|| Haller. com. in instit. § 374.



aut si post septimum diem febris inflammatoria Ischuriae succedit. Signa habentur fatalia, si sudor jam incipiat sapere et olere urinam; si aegri os urinoso sapore vitietur, vel naribus odor idem imprimatur; etsi in casu, a nobis relato, saporem urinosum signum non semper esse lethale, jam vidimus (vide p. 24.): si porro urinae suppressioni tenesmus supervenerit, aut singultus \*. Pessimum est signum, si affecti nullum sentiant dolorem. In senes Ischuria plerumque faevior evadit. A colluvie serosa, in corpore retenta, Ischuriam quandoque excipit hydrops; sicut vicissim hydropici hoc symptomate saepe anguntur †.

“ Est autem in febribus Ischuria aliquando critica, ut ea, quae vehementibus rigoribus supervenit, estque futurae crisis praenuntia,” inquit DURETUS ‡.

VIDEAMUS jam quomodo natura, hoc morbo tentata, se levare conatur. HALLERUS vidit Ischuriam, undecimo die sponte sublatam ||. Diarrhoea Ischuriae aliquando supervenit, ob acre in corpore retentum, et in intestina delatum. Sic BENIVENIUS ait, quod puer duodecim annorum, cui per septem dies urina fuit suppressa, eandem de-

\* River. oper. p. 364.

† Juncker. consp. med. p. 802.

‡ Com. in Hollerium, p. 496.

|| Ibid.

mun per alvum excreverit, et sanatus fuerit \*. SCHENCKIUS memorat Ischuriam sedecim dierum, a diarrhœa aquosa solutam †. Apud eundem observatorem habetur casus fœminae, cui per semestre spatium, a terrore urina cohibita fuit; quae ubi rursus effluere visa est, alvus per quatuor menses adstricta fuit: tandem utrisque suppressis, urina circa ventriculi regionem, magna copia, odore et colore se proferens, exudavit. PRAXAGORAS narrat, quendam se vidisse, cui urina sede excernebatur per duodecim annos. Pueri historiam refert cel. Doctor RICHARDSON, qui lotium nunquam reddidit, et perpetua diarrhœa laboravit ‡. Idem vidit CARDANUS ||. Ex auribus urinam effluxisse vidit PLATERUS \*\*. In thoracis cellulosam fabricam regurgitasse vidit RUYSCHIUS ††; in habitum corporis FERNELIUS ‡‡. SCHENCKIUS aliam enarrat Ischuriae aliquot dierum historiam, a tumore, in sinistra nate apparente, ita lenitae, ut, cum in suppurationem deductus est, in ulcus malignum degeneraverit; ex quo (urgenti nempe urina) lotium reddebatur. Plu-

\* Schenckio testante obs. med. p. 492.

† Ibid. p. 489.

‡ Phil. Trans. No. 337. p. 167.

|| Fidem faciente Schenckio, ibid.

\*\* Teste Hallero, comment. in instit. § 384.

†† Cent. obs. med. chir. n. 56. teste Hallero. ibid.

‡‡ De part. morb. L. vi. c. 12. Eodem teste.



ra, eaque fatis mira, enumerari poterant ; sed haec adduxisse sufficit.

IN urinae suppressione vero, etsi natura aliquando sibi soli sufficiat, plerumque tamen huic morbo succumbit victa, nisi medicina auxiliarem porrigat manum. Et hic monendum est, quod post tempus quoddam, nulla sit urinae vicaria excretio, ex qua nos dependere oportet ; purgantia enim hydragoga, et sudorifera potentissima, ut sanguis illo acri retento liberaretur, saepe tentata sunt, sed frustra ; nam funestus morbi eventus prorsus inevitabilis est, ni excretio urinae solita reddatur. BOERHAAVIUS, ut ægrotis levamen adferret, et mortem protraheret, venam repetito secuit ; vomitum bis de die movit, et alvum jalappa subduxit ; sed incassum \*. Ex acidorum medicamentorum usu, aegroti plus profecere ; at neque per haec, licet a cl. BAYNARD adeo laudata †, quis servari poterat ‡.

QUOD ad CURAM attinet, illam, sicut ex dictis apparet, variam esse oportet, pro causarum diversitate ; et quoniam omne medici consilium in causae, urinam supprimentis, sublationem conferri debet ; huic operi leviter attingendo nosmet jam accingamus.

Ex omnibus antedictis, binae indicationes curatoriae elici possunt. 1<sup>mo</sup>, Urinae in ve-

\* Com. in Instit. § 384.

† Phil. Transf. n. 215.

‡ Boerhaav. ibid.

fica contentae, transitum suum solitum red-  
dere. 2do, Morbi recursum praecavere.

ET hic imprimis una opera observan-  
dum est, quod in omni fere Ischuria vesi-  
cali, catheteris immissio adhibenda sit;  
sed non antequam aliae leniores metho-  
di inefficaces inveniantur\*; quoniam inter-  
dum non sine dolore ac inflammatione  
catheter immiti potest. Hinc patet, quod  
in urinae suppressione, ex inflammatione  
colli vesicae orta, in usum non veniat,  
priusquam venaesectio et clysmata praeces-  
serint. Clysmatum autem universalis est  
usus, at maxime, si supra urethram causa  
haereat.

SI propter inflammationem urinae exitus  
denegetur, venaesectio liberali celebranda est  
manu, et pro re nata repetenda. Clysmata  
quoque emollientia, et fomenta, pro in-  
flammationis situ, perinaeo aut regione pubis  
admovenda, haud negligi debent. Dum haec  
fiunt, salia neutra, quorum praecipuum est  
nitrum, nostraeque intentioni magis accom-  
modatum, debita dosi propinanda sunt.

CUM a spasmo Ischuria fit, antispasmo-  
dica, in usum internum, et externum revo-  
cata, locum habent. Horum facile prin-  
ceps est opium, quod hodie usurpatur in om-  
ni pene Ischuria, spasmo sphincteris stipata;  
ea sola, quae ab inflammatione originem

\* Heister. chirurg. p. II. cap. 137. p. 160.



ducit, excepta. Enemata etiam, quae talia recipiunt, sunt utenda. Convenit vero imprimis, et caeteris fere omnibus palman hic praeripit, enema, quod in pharmac. pauper. Edinenfi *terebinthinatum* audit; et quod ter quaterve, instar incantamenti, operari vidi. Vesicatoria quoque, in urinae suppressione, febris supervenienti, applicata, aliquando ejus fluxum promovent.

NONNULLI proposuerunt aegri pedum immersionem subitam in aquam frigidam, vel frigidae in crura ejus et femora aspersiorem: in Ischuria duorum dierum, hoc semel vel bis tentatum vidi, cum successu. In febribus quibusdam, cum urina intercipitur, Ischuria nonnunquam solvitur, aegroti de corpore stragula detrahendo, et nudum aeri externo exponendo: hanc methodum intentioni respondere vidi; sed, ni fallor, periculo non caret.

IN variolis, five distinctis, five confluentibus, quoties urinae suppressio accidit, aeger e lecto eximatur, et cubiculum bis terve circumambulet\*.

HAECCE sphincteris constrictio aliquando adeo fortis est, ut ipse catheter in vesicam immitti impediatur†. Si ab acri urina spasmus procedat, decocta lenientia, scil: malvae, althaeae; infusum lini, syrupus ex althea, e-

\* Sydenham. sect. 3. cap. 2. p. 142.—Sect. 3. cap. 3. p. 160. et Procef. integr p. 593.

† Heister. compend. med. p. 253.

mulſiones, ex amygdalis dulcibus factae, et olea blanda profunt. Medicamenta quoque leniter diuretica, ut decocta radicis petroſellini, radicumque aperientium, hic proficiunt; quae, ut copiam urinae augent, ita neceſſario ejus acrimoniam minuunt. Si dolores urgeant ad leviter opiata, clyſteres, fatus, balnea, confugiendum eſt\*.

Si Iſchuriae infantum cauſa ſit lac nutriticis vitiatum, hoc mutandum eſt per diætã aptam, vel ipſa nutrix cum alia eſt commutanda†. Ad curam nihil magis confert, quam alvum ſaltem naturalem ſervare. Potus tenuiter diureticus nutriticî, aut infanti præſcribendus eſt, ex decocto petroſellini, graminis, foeniculi‡; ſi vero ablactetur infans, ejus diætã emendanda eſt; et ſi acidum in culpa ſit, magnesia alba, quae et acidum extinguit et ſimul alvum leniter ſolvit; lapides cancrorum, aut pulveres teſta-cei uſum haud ſpernendum præſtant. Com-  
moda quoque inſignia edunt ſyrupus papav. alb., balnea, fomenta.

Cum a paralyſi urina retinetur, friktiones, fomenta, et cataplaſmata roborantia, nervina et ſpirituofa, utilia evadunt; nec non clyſmata ex medicamentis ejusdem indolis infundenda ſunt. Haec dum aguntur, remedia interna non ſunt contemnenda, quo-

\* Heiſter. p. 256.

† Hoffmann med. rat. vol. 3. p. 493.

‡ Heiſter. ibid.



rum prima sunt vinum, cortex Peruv. et amara. Interea cura habenda est, ne urina in vesica tamdiu morari permittatur, ut eam distendat, et sic necessarie malum augeat. Laudat HEISTERUS cataplasma ex-cepis assatis, regioni pubis admotum, et id usu compertum habere testatur\*. Urina nonnunquam depellitur per manum, eandem partem prementem†.

SI, urina diurne retenta, vesicae fibrae a nimia distractione jam debilitatae sunt, tunc convenit lotium per catheterem educere. Urina extracta, bis terve de die intermittendus est catheter, vel potius catheter flexibilis in vesica relinquendus, donec fibrae, quasi paralyticae factae, pristinum suum robur recuperaverint, si recuperare possint; quod cognoscitur, si aeger ex arbitrio mingat facile, et cum impetu satis magno. Sed cavendum est, ne in vesica remaneat catheter ultra diem decimum vel duodecimum; cum saepe intra duas septimanas ad se incrustationem calculosam attrahat‡. Omni cura tamen inutili reddita, manet frequenter urinae stitilicidium.

Quod si a lapide orificium vesicae obstruatur, lapis cathetere in vesicae cavum repellendus est, aut citra catheterem, agitatione multa, recumbente aegro supino, ita ut

\* Ibid. p. 257.

† Heister. chir. p. 11. cap. 137.

‡ Sharp's critical inquiry, p. 129.

crura elata sint ; vel aegrum in caput invertendo. Cum vero ex calculo, in vesicae cavo contento, dolores, spasmi et urinae retentio sequuntur, licet parva febris adsit, opii usus, per anum et os, egregie proficit \*. Si pulsus plenus sit, venaesectio juvat, semel aut bis celebrata, ut HIPPOCRATES monet in cura dysuriae †. Decocta quoque, olea, et emulsiones, supra dicta, cum fotibus emollientibus ex papaverum capitibus, externe adhibitis, cumque semicupio, effectum egregium praestant. Si Ischuria ab hac methodo fugetur, aqua calcis (cujus vires et naturam indagavere, plurimisque experimentis confirmavere, in hac academia medicinae professores, cl. ALSTON ‡ et WHYTT ||) et sapo Hispanicus, ad paroxysmi reditum praecavendum, si non ad curam radicalem obtinendam, mannae et rhabarbari dosi subinde interposita, eximii sunt usus. His vero, atque cathetere frustra tentatis, punctura in perinaeo, aut supra os pubis, et in casibus jam memoratis, et in futurum memorandis, ilico instituenda est \*\*, praxis quidem saepius laudata, quam exercita ††.

\* Mead. monit. et praecep. med. de morb. ren. et vesicae.

† Aphor. 36. Sect. vi.

‡ Vid. ejus primam, secundam, et tertiam, de aqua calcis dissertationem.

|| Vid. Whytt, on lime-water.

\*\* Heister. chirurg. Le Dran, et Sharp's critical enquiry.

†† Sharp. ibid.



Quod ad illam spectat Ischuriam, ex calculo, urethram obturante, proficiscentem; oleum amygdalarum dulcium in meatum injicienda, et mox aer inflandus est; dein calculus digitis propellendus, et denuo urethra oleo inungenda. Si prope extremitatem urethrae haeret, aliquando instrumento, ab egregio Halesio invento, extrahi potest\*: si minor sit calculus, saepe exugitur potest, at praecipue in infantibus†; in feminis facili negotio extrahitur. Expulsionem quoque promovet, virgam in aquam cum lacte tepidam immitti; imo aegrum in femicupium descendere. Venaesectio, ac opiata quoque huic scopo attingendo multoties requiruntur. Si vero omnia haec incassum tententur, calculus excidendus est‡.

Si causam debet Ischuria vesicae colli abscessui, ille intromissione catheteris aliquando feliciter ruptus est; pus e vesica derivari oportet, quod sit injectione lactis tepidi, aliis emollientibus commisti||. Hac methodo parum proficiente, culter restat.

Cum vero a glandula prostatica, tumida vel schirrofa, via urinae tollitur, immissio catheteris tentanda est; dein malum remediis, schirro aptis, tractari debet.

Si pituita urinae proventum prohibet, post urinae per catheterem educationem, aqua calcis,

\* Vegetable statics, vol. 2. p. 248.

† Et in spasmo quoque sphincteris, urina interdum suctu elicitur.

‡ Sharp's crit. inq. ibid.

|| Hoffinan. p. 410.

minerales aquae, et crebra, ope mannae, purgatio iteratum in morbum lapsum praeveniunt.

CONCRETO sanguini, cum cervicem obstruendo, Ischuriam parit, fluor conciliandus est, si fieri possit, et via laxanda; haec fiunt aqua, cui oxymel est admistum\*, et decoctis vel infusis althææ, ficuum, glycyrr., calidis affatim haustis, atque injectis.

QUOTIES Ischuria ab ulcere vesicae sequitur, per catheterem urina removetur; sed origo mali plerumque omnibus medici conatibus resistit; maxime vero, si aeger sit senex. Infusa radicum et herbarum vulnerariarum, leniaque balsamica, per longum tempus pota, prodesse visa sunt. Mentio vero aquae calcis, corticis Peruv. et pil. mercurial. laxant., hic loci non supprimi debet, utpote insignis commodi medicamentorum. Ene-mata quoque, ex herbarum traumaticarum decoctis, quibus parva mellis rosarum quantitas immiscetur, aliquando conferunt †. Anodyna etiam, urgenti dolore, in usum veniunt; at senibus parce exhibenda. Omnia diuretica acriora caute vitanda sunt.

CUM caruncula, cicatrix, aut strictura in causae est, curatio *Bougie* dicto tentari debet. Caetera peti possunt ex chirurgicis ‡.

\* Hoffman. Ibid.

† Heister compend. p. 259.

‡ Vid. Heister. le Dran. Daran, et Sharp's Crit. Inquiry.



IN Ischuria, ab hernia cystica proveniente, aeger, tumorem elevando et comprimendo, urinam ut plurimum emittere potest. Si hernia recens sit ac libera, reductio erit facilis; sin minus, praeter aptum *suspensorium* dictum, nihil aliud tentari queat \*.

CUM ab haemorrhoidibus internis, vel earum propter molem, collum vesicae praementibus, vel propter dolorem, sphincterem per sympathiam afficientibus, inducitur Ischuria; ruptis vasis tumentibus, sanguinis copiosa per anum excretio saepe morbum sanat. In hanc Ischuriae causam, si malum sit inveteratum †, non multum effici potest, praeter alvi lenem solutionem, ne scil. faeces praetereuntes, maxime si durae sint, inflammationem et dolorem augeant ‡. Clysmata ex gelatinosis, cum vel sine opio, ut res monet, injecta, dolorem mitigant; cujus generis est enema de amylo pharm. paup. Edin. ||. Si haemorrhoides internae radicitus curari possint, clysmata, ex decoctis herbar. vulner. comparata, cum cera, oleo, et gum. arab. solutione (balsama enim in hoc casu nimis stimulant) apprime utilia

\* Pott's Treatise on ruptures, p. 231.

† Si haemorrhoides internae ullo modo schirrosae evaserint, ex cicutae vulgaris *extracto*, quod in tumoribus schirrosis, cancrofis ac strumosis, nec non fistulis veteribus, tam pulchre profuisse nuper repertum est, commodum insigne obtineri posse, verisimile videtur. Vide STORK de virtute cicutae, &c. &c.

‡ Ex cl. Rutherford praelectionibus clinicis.

|| Ex iisdem.

sunt \*. In initio, et tunc solum plerumque curationem admittunt, aquae minerales, alvum leniter solventes, aegris sanitatem promittunt †.

SI a foetus capite, collum vesicae premente, Ischuria ortum trahit, clyster injiciatur, et subinde catheter adhibeatur. Si post partum difficilem, inflammatio ejusdem partis, aut urethrae oriatur, fomenta ex aqua cum lacte tepida, vel decoctis emollientibus valde profunt. Quod si, tempore graviditatis, Ischuria ex utero, orificium vesicae premente, sequatur; transitus urinae redditur, uterum gravidum elevando per digitum, in vaginam intromissum: nec enema, si venter sit adstrictus, negligendum est.

ATQUE sic, L. B. Ischuriae vesicalis praecipuas causas ac earundem curam tandem attigimus. Si quid autem, vel nimis festinanti calamo, vel perversae hujus morbi tractationi referendum, erratum inveneris, aequi, bonique consulas velim; cum non scribendi cacoëthes, sed aequis academiae institutis obsequentia, in publicum, me invitum compellit.

\* Ex iisdem.

† Ex iisdem.



